

En regurdientscha da  
**Vigeli Beer, Sedrun**



Dapi ils 18 da november ruauissan las restonzas terrestras da nies convischin Vigeli Beer el santeri da sogn Vigeli. Cun Vigeli Beer ha in'atgna personalitat da caracter original bandunau quest mund.

Vigeli Beer ei naschius ils 18 d'uost 1892 a Sedrun sco sulet fegl d'ina famiglia da 9 affons. Sis soras ein mortas da pign, quasi sco aunghehs. Las duas outras han contonschiu ina vegliadetgna patriarcala. Sia sora Elisabet ch'ei stada la fideivla tgi-runza tochen la mort, ei morta 1962 cun 82 onns e l'autra sora Marionna 1975 cun 88 onns.

Igl onn 1910 serenda il Vigeli a Cuera ed entscheiva igl emprendissadi da scrinari. El temps liber studegia el franzos, fa plans e s'occupescha oravontut culs differents stils dallas numerosas epochas naven dils Egipzians entochen als stils moderns. L'occupaziun da scrinari ei per il defunct buca mo mistregn, mobein clamada. Differents objects construi dil defunct Vigeli dattan perdetga da sias capaci-tads, da sias grondas enconuschient-

schas ed atgnadads persunalas. El ei adina staus in scrinari conscienu-sus ed exact-mintgaton quasi in pedant.

Suenter igl emprendissadi a Cuera vess nies car defunct bugen fatg il garsun. Denton cheu entscheiva l'em-prema uiara mundiala e ses plans dattan ell'aua. Il defunct, libers dil survetsch militar, concepescha ils plans per sia casa nova. Silsuenter suonda l'ereczion da tala. Igl onn 1915 serenda el a Tavau e gida a constuir la nova baselgia catolica. Otg unviarns cattein nus el a Tavau. Mintgamai la stad ei Vigeli a casa e gida ses geniturs. Igl onn 1920 con-struescha el las stallas dell'Alp Tschamut. Ella baselgia da s. Gia-chien a Rueras s'occupescha il capavel scrinari cun differentas lavurs. 1927 baghegia el il niev teschamber, 1928 vegn il clutger-baselgia restauraus ed anno 1935 construescha il defunct la nova lautga. — Ils onns 1930-31 an-flein nus il defunct a Küsnacht/Tur-itg. Sco el ha raschunau seigi quei danovamein stau in'oreifra scola da perfecziun, che hagi purtau buns fretgs.

Suenter ha il Vigeli adina luvrau a casa. Demai che sia sora Elisabet ha adina fatg bien cun el pupergnau il sulet frar, ha el buca schau vegnir endamen da far nozzas e sez fundar famiglia. Denton tscheiver ha el fatg dabia. Quei san ins leger en si s noti-zias biograficas. Sia veta ei denton stada in survetsch a Diu ed al con-carstgaun. Ussa era el il vegl um en Tujetsch. Ils dus davos onns da sia veta ha el passentau en nossa casa s. Vigeli, nua che las bunas soras e sias niazas han giu bien quitau per el. Ussa ha nies Vigeli fatg il pass vi ella perpetnadad. Il Segner detti ad el la pagaglia meritada ed il rauas perpe-tuen. El rauassi en pasch! L.J.